



La sala da concert dil Riders Palace ei semidada quels dis en ina sala da sessiun per la giuventetgna.

FOTOS S. BUNDI



Felice Guarino ei docent agl institut per construcziun e creaziun alla HTW Cuera. El ha menau il workshop che ha projectau la sala pil parlament giuven el hotel Riders Palace.

Las siarps da seser ein semtgadas

La sala dil «Riders Palace» ei vegnida transformada en ina sala da parlament

DA SIMON BUNDI

■ **Damaun arva Reto Gurtner ensemen cun representants dalla politica a Laax el hotel Riders Palace la Sessiun federala da giuvenils 2006.** La grupp Arena Alva ei partenaria dalla Federaziun svizra dallas Associazions da giuventetgna (FSAG) che coordinescha la Sessiun da giuvenils. Fertion che la FSAG ed il comite d'organisaziun dalla sessiun da giuventetgna ein responsabels per las tematicas metta l'Arena Alva a disposiziun l'infrastructura pil spitachel. Leutier hagien els saviu sustener ils giuvenils cun savida organisatorica, ha la plidra da medias dall'Arena Alva Britta Kaula detg.

Design dalla HTW Cuera

Per ch'ils 200 giuvenils dall'entira Sviz-

ra sappien debattar la fin d'jamna a Laax-Murschetg han ils responsabels fatg quest'jamna dalla halla da concert dil «Riders» ina sala da parlament. La primavera vargada ha la Grupp Arena Alva dumandau igl institut per construcziun e creaziun dalla HTW a Cuera da sviluppar ideas per in tal project. Siat propostas ha ina grupp da lavur sut la bitgetta dil docent Felice Guarino elaborau ed inoltra a Laax. Ensemen cun ils students e la FSAG seigien els allura sedecidi per ina varianta, ha *Catia Tschuor*, callaboratura dalla Arena Alva, declarau.

Siarps sin glera

Il project definitiv han collaboratur dalla Arena Alva, commembers dalla FSAG e students dalla HTW exequiu quest'jamna ella sala da concert dil «Ri-

ders». Per curclar il plantschiu han ins carrau neutier glera dalla cava da Schluein. Sin quella tschentans els crusch e traviers sacs liungs da stiropor en color pink che vesan ora sco siarps. Quels sacs han ils scolars battegiu «tazels». Els fuorman la part centrala dil project. «Sin quellas siarps han ils giuvenils ina posiziun da seser sco en ina lounge», di Felice Guarino ed aschunta: «La posiziun da seser ensiara la moda e maniera co enzatgi sedeporta e s'exprima.»

Plinavon detti ei buca hierarchias, di Felice Guarino, mintgin stoppi anflar sez siu plaz ella halla da parlament. Sulettamein dus sempels podests pils moderatur dil plenum sedistinguon dallas ligiongias pinkas. La glera dil Rein fa tenor el allusiu alla greppa grischuna: «Sin quei material ein las ideas glischontas inscenadas en fuorma dallas

siarps da seser», ha Felice Guarino concludiu. Leutier enzuglian ils gidonters la halla entuorn entuorn cun umbrivals

ners, quei che dat in cert effect da sorpresa cu ils giuvenils passan en «lur» parlament.

«Giuvens – globals – colligiai»

La Sessiun da giuvenils dat ei dapi igl onn 1991. Igl ei denton l'emprema ga che quella dieta da giuvenils dall'entira Svizra ha liug ordeifer la casa federala a Berna. Ensemen cun l'Arena Alva ha la Federaziun svizra dallas Associazions da giuventetgna (FSAG) organisau quella dieta el hotel da design Riders Palace a Laax, nua ch'els vegnan a tematisar il slogan «giuens – globals – colligiai». Sut quei motto tractan els tematicas dall'agenda politica actuala, aschia per exempel la disoccupaziun

da giuventetgna ni il service public. La finamira ei da surdar al parlament nazional petiziuns ch'els giuvenils elaboreschon en pintgas gruppas da lavur e discuteschan el plenum. Sco tier ils «gronds» vegn il program accumpignont era buc alla cuorta el parlament da giuventetgna: La sonda sera dat ei in concert public cul rapper Gimma e la dumengia san ils participonts eleger denter River-Rafting, ina excursiun ella bieraria da Flem, ella nova casa da RTR a Cuera ed auter.

Surselva el center dall'Europa

Emprem Forum economic dalla Regiun Surselva

DA MARTIN CABALZAR

■ **La Giuvna combra d'economia dalla Surselva ed il Post da promoziun dall'economia dalla Regiun Surselva envidan ils 10 da november agl emprem Forum economic Surselva.** Dalla partida vegnan personalitads enconuschentas sco ant. cusseglier federal Joseph Deiss, il sviluppader da skis Simon Jacomet, il cosmonaut Werner Schäppi e Hennig Wacker dalla regia Stallinger ad esser. Il Forum Surselva che stat sut il tetel «La Surselva el center dall'Europa» sedrezza tenor il promotur regiunal d'economia Pieder Vincenz primarmein a tus interprendiders dalla regiun, denton era ils politichers locals e regiunals ed ils funcziunaris d'instituziuns publicas ein plidentai. Il Forum Surselva duei esser ina nova plattafurma per sviluppar ideas, enflar ed intensivar ils contacts denter ils exponents dall'economia regiunala. Dalla organizaziun Forum Surselva fan part sper il pomotur d'economia Pieder Vincenz ils suandonts representants dalla Giuvna combra d'economia Surselva: *Flurina Caveng* (Glion), *Tarcisi Cavigelli* (Mustér), *Giusep Coray* (Laax), *Clau Degonda* (Cumpadials) e *Marcellino Giger* (Sedrion).

La Surselva el center dall'Europa

Ils iniziants vulan bandunar empau l'imaginaziun magari derasada che la Surselva seigi ina regiun periferica ed isolada ellas Alps. Il cuntrari. Ils giuens



Igl emprem Forum Surselva ha liug ella basa dalla Air Grischa a Tavanasa. MAD

economis puntueschan che La Surselva seigi la pli gronda regiun dil cantun Grischun. Plinavon seigi la Surselva «ina regiun muntagnarda, ina regiun turistica, ina regiun economica, ina regiun cun riezias naturalas e culturalas». Pieder Vincenz e ses collegas ein perquei perschuadi che la Surselva seigi ina regiun ideala per realisar in tal «forum aviert, innovativ e creativ» che sefatschenta d'actualitads regiunals. La finamira ei era da svegliar discussiuns fritgeivlas per in svilup persistent ella regiun. Sco maxima vala la sentenza dil scribent franzos: «Sche ti vul baghegiar in bastiment

stos ti buc animar da pinar lenna, mo-bein svegliar il desideri per la mar.»

Quei desideri vules il Forum Surselva svegliar tier las interpresas, tiels politichers e funcziunaris e tier la populaziun dalla regiun. Cun la maxima «Surselva el center dall'Europa» vegli ins demonstrar l'impurtonza dil patetgar global e digl agir local. La Surselva seigi circumdada da gronds centers economics. Quels centers porschien era alla Surselva potenzials ch'ins stoppi trer a nez meglier. Per che quei reusseschi munti ei tgar il contacts necessari. Ils iniziants dil Forum Surselva ein cuncients che la rea-

lisaziun da lur project basegna ina buna purziun curascha da riscar enzatgei per la finala saver realisar las ideas skizzadas.

Dils skis da Mustér tier las steilas

Igl emprem Forum Surselva vegn ad haver liug ils 10 da november 2006 ella halla dalla Air Grischa a Tavanasa. La dieta vegn introducida il suentermezdi cun la presentaziun dall'interpresa Zai da Simon Jacomet che ha sviluppu in agen ski ed aviert ina interpresa da construcziun da skis a Mustér. Simon Jacomet vegn a demonstrar quei di con impurtonza che ina spessa reit da relaziuns sigl entir

mund ei per il prosperar dall'interpresa. Sco commember dalla direziun dalla interpresa forestala Stallinger vegn Hennig Wacker ad informar daco che quella interpresa austriaca investescha en Svizra ed el Grischun.

Igl anteriur minister d'economia Joseph Deiss vegn ad accentuar la necessitad da reits naziunals ed internaziunals per las regiuns da muntogna en in mund globalisau.

La dieta vegn terminada cun in sgol egl univers cun ina discurrenza davart las steilas ensemen cul cosmonaut Werner Schäppi.

Damai ch'ils quater referents derivan da differentas spartas e disponan da differentas experienzas da veta astgan ins esser spanegiaus silla discussiun finala culs referents ed ulteriurs partenaris.

Sco quei che Pieder Vincenz puntuescha seigi il Forum Surselva mo realisabels grazia al ferm sustegn digl Uffeci d'economia e turissem dil Grischun, dalla Banca Raiffeisen sco sponsor principal e da Apart GmbH, Air Grischa, aurax energia e la cassa da malsaus ÖKK sco era d'ulteriurs fautors. Grazia a lur sustegn ha il prezi da participaziun saviu vegnir sbasaus sin mudests 60 francs. Bugen quantan ils organisatur perquei cun ina stedia participaziun. Dalla partida ei era La Quotidiana sco partenaria da medias.

Annunzia ein d'inoltrar al Post per la promoziun d'economia dalla Regiun Surselva, Via centrala 4, 7130 Glion per tel. 081 920 02 40. Ulteriurs informaziuns sut www.forumsurselva.ch